

DOMENIE V DI PASCHE

Jutoris pe Liturgjie

Domenie, ai 19 di Mai dal 2019

Il vanzeli di vuê nus presente un tocuto dal discors di Gjesù te ultime cene. Scoltant, nus somee di sintî lis ultimis preziosis peraulis di un pari e di une mari che a saludin i fîs, o ancje di olmâ la sapience di une persone che la vite e à madurât o di clarî la vôs de cussience che e done la uniche vere rispueste a la moderne tragedie / comedie / fastidi (“noia”) de vite.

Il dissepul di Gjesù si ricjate tun unic comandament: che si voledis ben un cul altri, come che jo us ai volût ben. Duncje pal cristian dut il rest: dutrinis, catechesis, boletins, pelegrinagjos, santuaris, devozions e rîts a diventin secundaris, intant che nol pò dineâ il troi proponût e nol pò tirâsi in bande dal esempli di Gjesù. Fin a un amôr, al disarès s. Pauli, che: nol è invidiôs, no si vante, no si sglonfe, nol mancje di rispîet, nol cîr il so tornecont, no si inrabie, nol ten cont dal mâl che i àn fat, nol gjolt de injustizie, ma si console te veretât. Al lasse cori dut, al crôt dut, al spere dut, al sopuarte dut. (1 Cor 13, 4-7)

E Gjesù al conclût: Di chest a ricognossaran ducj ch’o sês miei dissepui.

Antifone di jentrade

cf. Sal 97,1-2

Cjantait al Signôr une cjante gnove parcè che il Signôr al à fatis robonis; al à palesade la sô justizie in face di ducj i popui, aleluia.

Si dîs Glorie a Diu.

Colete

Diu onipotent e eterni,
rifinîs di un continui in nô il misteri di Pasche
par che cul jutori de tô protezion a puedin rindi une vore
e rivâ a la gjonde de vite eterne
chei che tu ti sês indegnât di rinovâ cul sant batisim.
Pal nestri Signôr Gjesù Crist to Fi, ch’al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

At 14,21-27

A contarin a la glesie dut ce che Diu al veve fat midiant di lôr.

Lis poejiis riis dai Ats no puedin palesânus i pericui e lis fadiis di chest lunc viaç di Pauli e di Barnabe; viaç che si è concludût a Antiochie, li che rivâts, a contarin ce che di plui biel a podevin contâ: dut ce che Diu al veve fat midiant di lôr e cemût che ur veve spalancade ai paians la parte de fede.

Pai nestris paîs li che i predis a son simpri plui rârs, il voli al va a chês peraulis: Ur meterin par ogni glesie un trop di anzians. Te nestre situazion diocesane, no isal za masse tart par cjapâ in considerazion lis sieltis dal apuestul Pauli? O no si nacuarzîno che ancjemò cualchi an e o restarî cence la gjenerazion che e va a mont e cence chê che e sta cressint?

Dai Ats dai Apuestui

In chê volte, Pauli e Barnabe a tornarin a Listre, a Iconi e a Antiochie, dant spirt ai dissepui e racomandantjor di stâ salts te fede parcè che, a disevin, si à di passâ par un grum di tribulazions prin

di jentrâ tal ream di Diu. Ur meterin par ogni glesie un trop di anzians e, dopo di vê preât e zunât, ju racomandarin a di chel Signôr che i vevin crodût. Scjavaçant la Pisidie, a rivarin te Panfilie e, dopo di vê predicjât la peraule di Diu a Pergje, a dismantarin a Atalie. Di li si imbarcjarin par Antiochie, d'indulâ ch'a jerin partîts racomandâts a la grazie dal Signôr pe vore ch'a vevin juste finide.

A pene rivâts, a derin dongje la glesie e ur contarin dut ce che Diu al veve fat midiant di lôr e cemût che ur veve spalancade ai paians la puarte de fede.

Peraule di Diu.

SALM RESPONSORIÂL

dal Salm 144

Scoltant ce che Pauli e Barnabe a contavin, al scugnive vignî dal cûr dal cristian il ringraziament al Signôr. O podaressin ancje nô domandâsi in ce che il Signôr al è pazient e di boncûr pes nestris comunitâts, in ce che e consist vuê la glorie dal so ream... E alore il salm al deventarès nestri e o podaressin dî:

R. O benedissarai par simpri il to non, Signôr.

O ben:

R. Aleluia, aleluia, aleluia.

Se cjantât: Il cjant dai salms responsoriâi, p. 219.

Il Signôr al è pazient e di boncûr,
pegri tal inrabiâsi e splendit te misericordie.

Al è bon cun ducj il Signôr,
il so afiet al rive sun dutis lis sôs voris. **R.**

Che ti laudin, Signôr, dutis lis tôs creaturis,
che ti benedissin ducj i tiei fedêi.

La glorie dal to ream ch'a contin,
dal to sflandôr ch'a fevelin. **R.**

Che ur fasin cognossi ai fîs dai umign la sô potence,
il sflandôr dal so ream e la glorie.

Il to ream al è un ream di ducj i secui,
la tô paronance e dure par dutis lis etis. **R.**

SECONDE LETURE

Ap 21,1-5

Diu al suiarà dai lôr vôi ogni lagrime.

Al jere un brut moment, di persecuzions, chel che a vivevin i cristians dal timp de Apocalîs. Epûr san Zuan apuestul nus presente ancje vuê imagjinis di Paradîs. Nus vise che nol è dut pierdût; anzit o viodei la citât sante... la gove Gjerusalem... la tende di Diu cui oms... e al conclût disint o viodei un cîl gnûf e une tiere gnove.

Cheste vision e vâl ancje par nô tal moment dramatic de glesie locâl e universâl che o stin vivint. San Pauli te prime leture nus à ricuardât che come glesie o podarìn ancje passâ par un grum di tribulazions... ma il ream di Diu al vignarà e no sarà plui la muart ni corot ni lament ni dolôr. A rivaran un cîl gnûf e une tiere gnove.

Dal libri de Apocalîs di san Zuan apuestul

Jo, Zuan o viodei un cîl gnûf e une tiere gnove, parcè che il cîl e la tiere di prin a jerin scomparîts e nancje il mâr nol jere altri. O viodei ancje la citât sante, la gnove Gjerusalem, a vignî jù dal cîl, di Diu, prontade tant che une nuvice che si furnis pal so nuviç. In chel o sintii une vôs fuarte ch'e saltave fûr de sente:

«Ve la tende di Diu cui oms!

Lui al starà framieç di lôr
e lôr a saran il so popu

e lui al sarà il “Diu-cun-lôr”.
E al suiarà dai lôr vôi ogni lagrime,
no sarà plui la muart
ni corot ni lament ni dolôr
parcè che lis robis di prin a son sparidis».
E chel ch’al jere sentât su la sente al disè: «Ve, o fâs gnovis dutis lis robis».
Peraule di Diu.

CJANT AL VANZELI

Zn 13,34

R. Aleluia, aleluia.

Us doi un comandament gnûf,
al dîs il Signôr:
che si voledis ben un cul altri,
come che jo us ai volût ben a vualtris.

R. Aleluia.

VANZELI

Zn 13,31-33.34-35

Us doi un comandament gnûf: che si voledis ben un cul altri.

Lis primis riis a son riis di glorie: glorificât... glorificât... glorificât... glorificarà... glorificarà in curt. La glorie di Crist al è il so amôr pe umanitât, amôr cence fin che lu condusarà a murî in crôs par nô. Cheste e je la sô glorie. e e sarà ancje la nestre se o rivarìn a meti in pratiche il so comandament: volêtsi ben un cul altri come che jo us ai volût ben a vualtris.

Parcè che: li che o soi jo al sarà ancje il gno servidôr. Se un mi servîs, il Pari lu onorarà, al dîs il Signôr (Zn 12, 27).

Dal vanzeli seont Zuan

Cuant che Gjude al fo jessût dal cenacul, Gjesù al disè: «Cumò il fi dal om al è stât glorificât e Diu al è stât glorificât in lui. Se Diu al è stât glorificât in lui, ancje Diu de bande sô lu glorificarà e lu glorificarà in curt.

Frutins, o sarai cun vualtris ancjemò par pôc. Us doi un comandament gnûf: che si voledis ben un cul altri; come che jo us ai volût ben a vualtris, ancje vualtris volêtsi ben un cul altri. Di chest a ricognossaran ducj ch’o sês miei dissepui, se o varês afiet un par chel altri».

Peraule dal Signôr.

Si dîs O crôt.

Su lis ufiertis

Diu, che pal incuintri sant di chest sacrifici
tu nus fasis vê part de tô divinitât uniche e infinide,
danus, par plasê, di testemoneâ cuntune vite degne
la tô veretât ch’o vin cognossude.
Par Crist nestri Signôr.

Antifone a la comunion

Zn 15,1.5

Jo o soi la vît vere e vualtris i cjâfs,
al dîs il Signôr;
chel ch’al reste in me e jo in lui,
chel al bute une vore, aleluia.

Daspò de comunion

Signôr, ti preìn, cjale di bon voli il to popul
e, daspò di vêlu inscuelât cui misteris dal cîl,

dai di passâ de viere a la gnove vite.
Par Crist nestri Signôr.

* * *

Riflession di pre Antoni Beline: Un ben come il gno

Ancje se chestis peraulis la glesie nus es esibìs tal timp sflandorôs di Pasche cuant che l'amôr di Diu par ogni om al à vût il spieli plui grant te muart e te resurezion dal Fi, a valin però par dut l'an, a valin par dutis lis etis, par simpri. Ancje parcè che Crist lis à ditis prime di consegnâsi a la muart e alore o vin di cjapâlis come testament e impegn...

Vanseli par un popul, an C, p.85

* * *

Cjants pal timp di Pasche

- Contait la buine gnove, *n. 66;*
- Crist nus da la sô lûs, *n. 158;*
- Victimae paschali laudes, *n. 159;*
- I cristians a cjantin laude, *n. 160;*
- Aleluia... O filii et filiae, *n. 161;*
- Sta legre, sante Glesie, *n. 162;*
- Christ ist erstanden, *n. 163;*
- Crist al è in vite, *n. 164;*
- Cristo risusciti, *n. 165;*
- Grosser Gott, *n. 166;*
- Al Agnel sacrificât, *n. 167;*
- Hvala veçnemu Bogu, *n. 168;*
- Te lodiamo Trinità, *n. 169;*
- Laudate Dominum, *n. 170;*
- O sin resurîts a la vite, *n. 171;*
- Benedete la zornade, *n. 172;*
- Il nestri Redentôr, *n. 173;*
- Si cjanti al Pari laut in cîl, *n. 174;*
- Nei cieli un grido risuonò, *n. 175;*
- O Cristo, sol di Pasqua, *n. 176.*

Salm 22 : Il Signôr al è il gno pastôr, *n. 241;*

“ : Il Signore è mio pastore, *n. 277;*

“ **94** : Vignît, batìn lis mans al Signôr, *n. 256;*

“ **80** : Gjoldêt in Diu nestre fuarce, *n. 256;*

“ **92** : Il Signôr al regne, *n. 258;*

“ **97** : Cjantait al Signôr une cjante gnove, *n. 261;*

“ **113a** : Cuant che Israel dal Egjit al è jessût, *n. 265;*

“ **113b** : No a nô, Signôr, no a nô, ma al to non dai glorie, *n. 266.*

Tal libri Hosanna, si puedin cjatâ ancjemò altris cjants e salms adats al timp di Pasche.

* * *

Io sogno ancora un mondo in cui non ci siano esclusi e sogno ancora una Chiesa che non esclude, ma che anzi stia dalla parte di chi non è difeso da nessuno. E ogni volta che viviamo la fraternità e che difendiamo gli indifesi succede che quella esperienza di duemila anni fa, ma anche tante altre che sono venute dopo, non è morta ma risorge e vive nelle nostre vite e nelle nostre scelte.

Questa è per me la resurrezione.

Sergio Gomiti, comunità dell'Isolotto di Firenze

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La nuova base.*
- * *Par domandâ chescj libris scrîvêt a info@glesiefurlane.org*